

NA Nassause Domeinraad II toegangscode 1.08.06 inventarisnummer 825
registnummer 217 gedateerd 9 augustus 1348.

1. Ic Dieric van Houweninghe, ridder, make cont allen luden mit desen tegenwordighen brieve dat ic houde
2. van enen edelen here, den here van Arkel, minen lieve here, een end twintich margen lants ende een half
3. ghelegen in den gherechte van Houweninghe, westwert alre naest Wouters lande van Nethen, end vier mar-
4. gen lands in den zelve gherechte, ghelegen westwert alre naest aen der stegen ende die steghe end twechghelt
5. mit horen toebehoren. End in dien zelve gherecht negen margen lants ghelegen westwert alre naest
6. Jan Reyners soens lande mit sulker tymmeringhe als nu ter tyt op desen lande staen of staen sullen
7. in allen den manieren dat die hantveste hout, die ic van minen lieven heren voerscreven daer af hebbe. In
8. orcond desen brieve beseghelt mit minen seghel. Ghegeven int iaer ons heren dusenth drie hondert acht
9. end viertich op Sente Laurens avont.

Transcriptie ALH.